

Pitschna midada – grond hist e host

Ellas duain vegnir schluccadas – las reglas per abitaziuns secundaras en chasas dal dretg vegl. En duas emnas discutescha il Cussegl naziunal surlonder. Mess en rocla la chausa ha cusseglier naziunal Martin Candinas avant trais onns cun sia iniziativa parlamentara. Perquai ch'el timuna quest'onn il cussegl sco president, na dastga el betg sa participar a la discussiun.



Dastg'ins? U dastg'ins betg? Far or dad ina abitaziun secundara gist duas abitaziuns en bajetgs dal dretg vegl – davart gliez debattescha il Cussegl naziunal en duas emnas.

FOTO SOMEDIA

CLAUDIA CADRUVI/FMR

En sasez vai be per midar in sulet artitgel en la lescha d'abitaziuns secundaras. Ma il hist e host en il Cussegl naziunal è programmà. En duas emnas debattescha il cussegl davart la midada. I dat in cumbat tranter quels ch'interpreteschan a moda severa il scumond d'abitaziuns secundaras e quels che giavischan schluccadas.

Enchalirada vegn la debatta entras la mancanza d'abitaziuns per indigens en regiuns turisticas.


Cumissiuon promova schluccada

I va per chasas dal dretg vegl che existivan gia avant il 2012. Quellas dastgan, sch'i sa tracta dad abitaziuns secundaras, vegnir engrondidas

per 30 %. Gliez n'è nagut nov e vala gia oz.

Ma igl è scumandà da stgaffir cun l'engroniment gist anc ina ulteriura abitaziun. Vul dir: Ins na po betg far or dad ina abitaziun da vacanzas (dal dretg vegl) duas abitaziuns da vacanzas. Gist gliez ha *Martin Candinas* vuli midar cun sia iniziativa parlamentara inoltrada avant trais onns. Sin fundament da quest'iniziativa ha la cumissiuon dal Cussegl naziunal formulà adattaziuns.

Lezzas lubeschan da far duas u pliras abitaziuns da vacanzas or dad ina chasa dal dretg vegl. La surfatscha na dastga simplamain betg vegnir engrondida per dapli che 30 %. Sulettamain sch'i vegn stgaffida ina abitaziun primara abitada tut onn, dastga l'engroniment sur-



passar ils 30 %. xLa cumissiu dal Cussegl naziunal ha approvà questa proposta cun 14 cunter 9 vuschs.

Cussegl federal fraina

Betg d'accord cun gliez è il Cussegl federal. El suttamenta ina proposta pli temprada che pertutga dus scenaris. L'emprim scenari pertutga ina chasa dal dretg vegl che vegn stgarpada giu e bajegiada si da nov ed engrondida per 30 %. En ina tala chasa dastga vegnir stgaffida in'ulteriura abitaziun. I sto dentant esser ina abitaziun primara.

Il segund scenari pertutga l'engrondiment da chasas dal dretg vegl per exempel en connex cun ina renovazion u sanaziun. Alura è lubida in'ulteriura abitaziun era sulettamain, sch'i sa tracta d'ina abitaziun primara, ubain sch'igl è ina abitaziun commercialisada turisticamain.

Finessas decisivas

A prima vista existan be pitschnas differenzas tranter il Cussegl federal e la cumissiu. Ma gist per indigens che vivan sur onn en lieus turistics e che tschertgan abitaziuns, èsi differen-

zas decisivas.

La varianta dal Cussegl federal schlucabain era la lescha d'abitaziuns secundaras, ma cun l'intent da stgaffir abitaziuns primaras – e betg abitaziuns secundaras sco la cumissiu.

Sper las duas variantas principalas datti anc propostas da minoritads. Ina da quellas pretendada da midar nagut. In'otra giavischan che las midadas pertutgian be vischnancas cun almain 50 % abitaziuns primaras.

Martin Candinas cun vusch da tagl

Sin dumonda da la FMR na less Martin Candinas betg s'exprimer. Sco president dal Cussegl naziunal na dastgia el – gugent u navidas – per il mument betg politisar, gnanca sch'i sa tractia dad ina fatschenta ch'el haja instradà. Era durant la debatta en duas emnas na sa posiziunescha el betg.

El timuna però la debatta sco president. Sch'igl avess da dar in patt entras paritad da vuschs en il cussegl, lura pudess el sco president decider cun la vusch da tagl.

Panzers, sanadad, energia e clima

In program pulpi ha il Parlament federal d'absolver en questa sessiu d'atun. Quest glindesdi ha il Cussegl naziunal gist prendì per maun las midadas da lescha per segirar il provediment cun current electric. Ils custs da sanadad vegnan tematisads gist en pliras fatschentas, per exempel cun l'iniziativa per premias da cassa da malsaus da maximal-

main 10 % da l'entradas, ubain cun in frain d'expensas. Er il clima occupa las chombras. Il Cussegl federal suttamenta ina nova lescha da CO2. Lura è l'Ucraina indirectamain in tema: Il Cussegl dals chantun decida, sche 25 panzers vegls dal tip Leopard 2, che n'èn betg pli en funcziun, possian vegnir vendids al producent en Germania. (fmr/vi)